

DOCENTENAN TA PONE PRESION PA NOMBRA FRANK ZAANDAM COMO DIRECTOR DI I.P.A.

ORANJESTAD (AAN): Docentenan di Instituto Pedagogico Arubano den un reunion di Dialuna a acepta unanimamente pa manda un carta pa Ministro Fredis Refunjol papidie pa nombra Drs. Frank Zaandam inmediatamente como Director di IPA.

Drs. Zaandam kende tabata director interino a ser nombra como director-adhunto di APA dia 1 di Augustus 1983, esta 9 aña pasa.

Durante e periodo ey el a fungi tambe como director interino ora cu e director no tey.

Desde cu e director a bay na Juli 1985, el a keda encarga cu Academia Pedagogico Arubano y e actual IPA (awor

caba pa 7 aña).

Ademas Zaandam tabata desde Juli 1989 como lider di e proyecto di IPA, cual a cuminsa exitosamente dia 1 Augustus 1990.

E docentenan di IPA na opina cu e situacion actual, esta cu ainda tin un director interino na lugar di un director, ta haci e instituto algo sin balor. Tambe ta contra tur principio di organizacion y maneho pa laga e funcion di director keda bashi pa asina hopi tempo, sin tin un motibo bon y valioso.

Mirando for di punto di bista local y internacional, e hecho cu e instituto aki no tin director ta crea un impresion malo.

Nan ta muestra cu ta contra tur etica e maneho di nombracion y cu esey ta testigo di mal maneho di parti di Gobierno y mas bien di Ministro di Bienestar General.

E docuentenan trahando na IPA a pone un ultimatum pa Gobierno, y esey ta pa nombra Drs. Frank Zaandam entrante 1 Augustus 1991 como Director di Instituto Pedagogico Arubano.

E carta ta firma pa diezseis persona, y copia a worde manda pa Ministro Presidente, Presidente di Staten, lidernan di fraccionnan tambe.